

Betong im Kopp

Om letzde Sunndaach hawwe de Karl unn ich unne vorm Herrsch om Kerwebaum gestonne unn hawwe uns betracht, wie der mett Keile ordentlich festgemacht iss. Mir hawwe enn Aacheblick noch uff de Schorsch gewart, awwer wie der nit kumme iss, sinn mir zwaa in de Herrsch unn hawwe uns on de Stommdisch gesetzt.

Kimmt de Schorsch heit später?, habb ich de Karl gefroocht, du waaßt, merr wolde heit widder iwwer die Riedstrooß redde. Wenn de Schorsch nit kimmt misse merrs halt nochemol verschiewe.

Koo Ohnung, gibt de Karl zur Antwort, ich waaß nit was der hott. Gestern habb ich enn noch gesehe unn doo hotter nix gesacht, dass er später odder iwwerhaupt nit kimmt.

Grad noochdem mir unsern Äppelwoi bestellt hadde, sacht de Karl: Honnes, du hosts joo aach geheert, dass dess Loch ferr de Kerweboom mett Betong zugeschitt war. Ich halls ferr e mords Sauerei, weil egal wer dess gemacht hott, mett Tradition hott dess nix, awwer aach iwwerhaupt nix ze due. Mir frieher hädde doch sowas nie gemacht.

Waaßde, habb ich zur Antwort gewwe, heit iss halt alles onnerst. Vill Junge heitzedaach hawwe halt erstens koon Respekt mehr vor onnern Leit unn fremde Sache, unn hawwe zweitens nimmi so vill Fantasie wie mir frieher. Dess iss joo aach koo Wunner, bei dene Computerspille unn Handys, die die hawwe, die junge Leit hawwe joo gar koo Zeit mehr ihrn Kopp ze trainiern. Unn so fehlts halt on Grips, doodeferr hawwese Betong im Kopp. Außerdem sehne jeden Daach im Fernseh, dass enn Spass nor dann enn richdische Spass iss, wanner dem onnern weh dut.

Frächt mich de Karl: Honnes, wie moonsden dess?

Ich sach: Sich nachts on de Kerweboom ze schleiche, die Platt owwedruff – die war joo zugeschweiß – mettem Winkelschleifer odder so was uffzeschneide unn sich debei nit erwische ze losse, doodeferr iss Organisation notwendig. Dess iss enn Oosporn ferr junge Kerle, dess versteh ich noch. Awwer dess Loch so voll Betong ze mache, dass die Kerweborsch unn ooner von ihre Opas e onnerthalb Stund erumkloppe misse, den Betong aus dem Loch ze kriehe, dess zeicht doch nor, dass dene ihr Herrnschmalz noch gedrillt wern muss.

De Karl hott genickt. Du moonst also, wennse den Deckel uffgemacht, enn Oomer voll Betong enoigestellt unn enn Zeddel debeigeleecht hädde, uff dem druffsteht: „Guckt emol, ihr Schloofhaube, mir hädde Betong ins Loch schmeiße kenne, awwer mir hawwes nit gemacht, doodeferr gebbt ihr ooner aus. Es grüße eich die Nachtarweider“: doo hätt jeder gelacht unn hätt gesacht, siehsde, aach dess Zuschweiß nutzt nix beiso gewitzte Kerle. Awwer so! Doo sacht merr doch eher: Wenn ich die erwisch, dann kenne die was erlewe.

Honnes, sacht de Karl, awwer wer bringst dene junge Leit bei? Die redde doch nit mett uns ahle Kerl.

Ich sach: Es missde sich nächstjohr long vor de Kerb e paar Johrgäng zesomesetze, unn de Ehrenkerweborsch odder de Ehrenparre misst dess moderiern. Doo misst besproche wern, was Tradition, was enn Straasch unn was e Vergehe iss. Unn dann missde se all verspreche, sich droo ze halle. Moonsde so was kennts gewwe?

De Karl hott genickt: Dess kennt geh, awwer nor, wenn merr emol on die Flerschmer Zeitung schreibe, dasses aach ooner von dene Betreffende lese kennt.

Eiern Honnes